

Arraunketa

ORIOITARREK IA BEDERATZI SEGUNDO KENDU ZIZKIOTEN ATZO SAN PEDROREN UNTZIARI

Zarauzko Bandera Oriora bidean

■ Oriok aurrerapauso itzela eman zuen atzo Zarauzko Bandera irabazteko. Hala ere, San Pedrori kendu dion aldeak ez du lehia erabakita utzi. Lehen kaletik jardun zuten Orio, Trintxerpe eta Getaria irabazi zituzten hiru txandak. Koxtapek bederatzigarren bukatu zuen.



Orioko traineruak aukera handiak dauzka gaurko jardunaldian Zarauzko Bandera bereganatzeko

JAGOBA MANTEROLA

Ramon Basaldua / Zarautz

ORIOK ez zuen huts egin atzo Zarauzko Banderaren lehenengo jardunaldian. Tito Manzillaren mutilak ziren faborito nagusiak, eta are gehiago kale zozketa egin ostean. Izan ere, lehen kalea zen onena, eta bertan aritzea tokatu zitzaion atzo Oriori, eta Txiki Larrañagak eta hark zuzendutako gizonak ondo baino hobeto aprobetxatu zuten olatuen indarra eta lantzakada ikusgarriak hartu zituzten.

San Pedrok ez zuen amore eman, laugarren kaletik aritu arren. Ohikoa duenez, Juan Carlos Fontanek zuzentzen duen Libiak irteera ikusgarria egin zuen, eta aurkarien aurretik egin zuen lehenengo ziaboga. Sanpedrotarrek lau segundo inguru kendu zizkioten Oriori eta zeozer gehitxoago Donibanekori. Bigarren luzean gauzak ez ziren askorik aldatu azken 50 metroak arte. San Pedro Orioren aurretik bazen ere, Kanpa izan zen aurrena bigarren ziabogan bigarren luzeke azken metroetan lantzakada ikusgarriak hartu ondoren. Hortxe erabaki zen estropada. Lehiaren ia zati guztian bigarren izan zen Oriok aurrera hartu zion San Pedrori. Tito Manzillaren gizonak lan izugarria egin zuten hirugarren luzean eta San Pedrori sei segundoko aldea kenduta burutu zuten hirugarren ziaboga. Lehen postua oriotarrentzat

ZARAUZKO BANDERA						
► Euskal liga						
postua	trainerua	1.zia	2.zia	3.zia	amaiera	kalea
10	Portugalete	5:11	10:18	15:56	20:56	1
7	Getaria	5:03	10:06	15:42	20:35	2
11	Zierbena	5:08	10:15	15:56	21:07	3
6	Santurtzi	5:06	10:15	15:46	20:52	4
3	Trintxerpe	4:56	9:53	15:19	20:15	1
12	Elantxobe	5:12	10:25	16:07	21:15	2
6	Donosti-Arraun	5:03	10:05	15:40	20:33	3
5	Zarautz	5:02	10:00	15:30	20:26	4
1	Orio-Cepsa	4:57	9:40	15:00	19:46	1
9	Koxtape-Iberdrola	4:58	10:04	15:34	20:55	2
4	La Navarra-Donibaneko	4:55	9:49	15:16	20:15	3
2	San Pedro-Philips	4:53	9:43	15:06	19:55	4

A. PENALBA

izango zela ia erabakita bazegoen ere, azken luzean lehia gogorra izan zen bi ontzien artean. San Pedrok ez zuen denbora askorik galdu nahi gaurko jardunaldian Bandera irabazteko aukerak mantentzeko. Oriotarrek, berriz, Bandera erabakita utzi nahi zuten. Azkenean, ia bederatziz segundoko aldea izan zen bi traineruen artean. Zumaian Donibanekok —San Pedroren aurretik geratu zen— lan polita egin zuen, baina ezin izan zion eutsi aurreko bien erritmoari. Koxtaperi dagokionez, estropada negargarria egin zuen. Pasai Donibanekoek ilusio

handiz ekin zioten denboraldiari, baina emaitzak ez dira espero bezain onak izan, gauzak okertuz joan dira, eta atzo Errekak ondo jo zuen. Kontxarako errekupeatzea izango da Koxtape- ren helburu nagusia.

Mikel Orbañanos, Asier Puertas, Xabier Urkizu, Ibon Gaztañazpi, Miguel Anjel Sarasua, Jose Antonio Olaskoaga, Jon Iriondo, Patxi Frances, Gorka Etxeberria, Ibon Urbietia, Iñigo Etxabe, Miguel Anjel Lizarralde eta Iñigo Arruti aritu ziren atzo Txiki Larrañagaren aginduetara. Luis Goñi, Angel Odriozola, Jon Redondo eta Andoni Sarasuak

atsedena izan zuten, eta, orain arte Manzillak egin duena ikusita, litekeena da lau arraunlari horiek gaurko estropadan aritzea.

Trintxerpek sekulako lana egin zuen atzo. Lau onenekin aritu ez arren Martxel Mitxelena- ren gizonak oso denbora ona egin zuten bigarren txandan, lehen kalean. Azpimarratzekoa da Oriok eta San Pedrok baino ez zutela hobetu Trintxerperen denbora. Bigarren txandan Zarautz izan zen bigarren, estropada polita eginda. Hiru aste geratzen dira Kontxako Banderarako sailkatzeke estropadarako, eta zarauztarrek itxaropen handia dute denboraldiko estropada ospetsuenean sartzeko. Bide onetik doaz behintzat. Getaria aise nagusitu zen lehen txandan, eta Liga barruan ego- tea merezi duela erakutsi zuen. Bizkaitarrak makal baino makalago ari dira. ✕

sailkapenak

Euskal Liga

1. Orio	35 puntu.
2. San Pedro	33 p.
3. Donibaneko	30 p.
4. Koxtape	22 p.
5. Trintxerpe	20 p.
6. Zarautz	17 p.
7. Donosti-Arraun	16 p.
8. Elantxobe	15 p.
9. Santurtzi	15 p.
10. Zierbena	15 p.
11. Portugalete	10 p.

Olasagasti: «Lan erdia egin dago, baina biribiltzea geratzen zaigu

■ Atzo izandako aldeek ezustean harrapatu dute Orioko presidentea

R. B. / Zarautz

JOSE JULIAN OLASAGASTIK, Orioko presidenteak, lehia gogorra espero zuen atzoko estropadan, eta azkenean Oriorentzat izan da garaipena. «Lehenengo laurak hamabost segundoren barruan egongo ginela uste nuen. Ez nuen uste izan diren aldeak izango zirenik», adierazi zion Olasagastik EGUNKARIARI. Haren iritziz, Zarauzko estropada ez dago erabakita. «Lan erdia egin dugu gaur. Bandera irabazteko bi egunetan asmatu behar da eta ea biharko estropadan lana biribiltzea lortzen dugun». Olasagastik aitortu egin zuen lehen kalean aritzeak lagundu egiten duela. «Hala da. Hala ere, estropada eremuko kanpoko aldean laugarren kaletik askotan olatuak Oriorantz markatu izan ditugu. Jendeak azken metroak baino ez ditu ikusten eta horietan lehenengo kaleko olatuak baino ez dira ikusten».

Luis Javier Salaberria, San Pedrok presidenteak kiroltasunez hartu zuen Orioren garaipena. «Ondo irabazi du, eta gure bigarren postua onartu egin behar dugu. Nolanahi dela, gustura hartuko nuen lehenengo kalea. Surf egiten ari zela ematen zuen. Tokatzen den kaletik aritu behar eta ea bihar zorte gehiago dugun», esan zion Salaberriak EGUNKARIARI. Atzokoa euskal ligako hirugarren estropada izan zen, eta horko sailkapenaren arabera osatu dira gaurko Zarauzko Banderako txandak. Getaria, Portugalete, Zierbena eta Santurtzi lehenengoan; Elantxobe, Donosti-Arraun, Zarautz eta Trintxerpe bigarrenen eta Koxtape, Donibaneko, San Pedro eta Orio hirugarrenean.

Bestalde, hemezortzi traineruk hartuko dute parte datorren ostegunean Bilbo Hiria Banderan. Erlojupeko lehia izango da, eta ordena honetan aterako dira ontziak: Iberia, Getxo B, Fortuna, Deusto, Pontejos, Portugalete, Ur Kirolak, Zierbena, Hondarribia, Isuntza, Arkote, Lutzana, Bermeo, Elantxobe, Getxo A, Santurtzi, Santoña eta San Pedro. Bestalde, Galizia eta Kantabriako txapelketak jokatu dira gaur. Bakoitze-ko aurreneko biek Kontxarako sailkatzeke estropadan parte hartzeke eskubidea izango dute. Tiran eta Perillo dira faboritoak Galizian, eta Castro, Santoña eta Astillero Kantabrian. ✕